

## Jeju Na Mehkwỳ Jakrã Cunea Wỳr

### MAM JOWĂW JŎ KĂHHŎC

ỠhỠ, pê Jowăw pê Jeju jarkwa na memprar catêjê nŏ. Ne pê mam cupê tep pro catê, pê Jeju ihkôt ipa catê na ahna ahwỳ. Pê caku crê kam Jeju kôt ipa, ne cute amji kam hapac xà cunea na hŏmpu. Ne ramă ihwej tu kam ri cutepjê cunea kam Jeju na mehkwỳ mă ihkàhhŏc ita hŏc, ne ihkujahêc. Na ri hŏ kàhhŏc ita japyrỳ te **Jeju Na Mehkwỳ Jakrã Cunea Wỳr, Mam Jowăw JŎ Kàhhŏc** (1 Jowăw).

Ne pom cu me mam ihkàhhŏc cahyt ita kam ri cute me pamă, pahte me ampo kên ton, neahna amji to me papimxur nare, ne hirăa pê Pahpăm mă pahte ahna me amji jarên to me pamă hahkre. Ne hanea ne jũ mă me pahte me, ne me papêPahpăm tekjê na pahte me amji jahkre pej to me pamă hahkre. Ne hanea ne cute me pahkwỳ me, me pamă ajpên kinti to me pamă hahkre.

*Jowăw te Jeju pupun na amji jarên xà  
Jowăw 1.1-4*

<sup>1</sup> Hàpà me ikwỳ pê Jeju na mehkwỳ, ipê Jowăw pê mam Jeju kôt me ipa catêjê atajênŏ. Ne pa wa ha me amă ihhŏc ne ihkujate. ỠhỠ, wa ha me amă ramă rỳ pêa mă pjê ton xwỳjrea na jũm ipa ata jarê, ne ahna ihhŏc. Ne jũm ita pê me

pamã pahte amji kam me pajapac xàjör catê. Ne cupê Pahpãm te amji kam hapac xà xakat. Ne cupê me pamã Pahpãm to ipipê catê. Cwýrjapê ri haprý pê “Pahpãm Jĩa Jarkwa”. Ne por jũm ata pê jũm nare, he cupê Jeju Crixto. Pê hũmrea na amji to, nepjê wýr wrý, pê wa ihkôt me ipa catêjê me, meijapac jĩa to me kampa, ne me ito jĩa to ajco me hõmpu, ne mehkôpĩ, ne itýj me ijũhkra to ajco mehcupê.

<sup>2</sup> Ýhỹ, Jeju mam Pahpãm cahê na ihkrĩ, ne cupê Pahpãm Jĩa Jarkwa, ne cupê me pamã cõjkwa pĩn Pahpãm te amji kam hapac xà to ipipê catê, ne pewa cute me cumã to ipipê na hõmpua na, wa me amãharên to mō. Ne taa mã ri Pahpãm cahê na pahte amji to me papijapar rohnýtti mã na me pahto.

<sup>3</sup> Ne ampo na mã wa me amã Jeju jarên to ipa to hane? Nee mã ampo na nare. Imã me ate Jeju me Pahpãm pê Hũm me, me ajpẽn to ikwý nõ na meato prãmte hajýar, pom pê wa ipê hõ ikwý nõ he. Ita na cu ha me pahcunea Jeju me ajpẽn kam me pahhõnco ita na me papa.

<sup>4</sup> Ate me ijō kàhhôc ita cahyt ne mempar, cu ajpẽn kam me pajakrya to me pajakry prãm to, wa ite me amã ihhõc ne ihkujahêc.

*Cu ha catyt kam Pahpãm jarkwa kôt me papa na, cu ha me pahhõnco tu*

*Epet 5.3-21; 1 Timot 2.5-6*

<sup>5</sup> Pê Jeju me imã, ite me amã Pahpãm jarên xà ita to pê hahkre he:

— Amcro jàhcujrohti ita ihtýj jũ ri me pamõr xà ata to me pamã hahkre, ne awcapàtkô kam,

cu nee jũ kam me pamõr xà ata na me amji jahkre pej nare. Ita kôpit na mãPahpãm pê amcro jâhcujrohti ata pyrâac, ne ihtÿj me pahte amji kam me pajapac xà impejti to me pamã hahkre — hane.

<sup>6</sup> Cwÿrjapê cu ha me pahnõ te nee Pahpãm kôt papa nare, ne pahtÿj ampo kên ton to me papa na, cu ha ihhêj ne awcapàtkô kam me pahkrĩ. Cu ha awcapàtkô kam me pahkrĩ cakrô, cu ha me amji jarên to:

— Ipê Pahpãm jô ikwÿ nõ, na wa cume ajpên kam ihônco ita na ipa — hajÿr na, cu ha ame pahhêj xia jarê, ne nee me papê catyt kam me papa catêjê nare.

<sup>7</sup> Ne nee pahte me hajÿr xà nare, cu ha quêt Pahpãm cuxà, catyt kam me papa, ne harkwa kôt me pahcunea ajpên to me ikwÿ nõ. Hõ, cu ha me pahcunea me hane, ne pahte me hajÿr xà ita pê ihhêj rûm amcrojâhcujrohti kam me papa xà ata pyrâac, ne ma amji mã me papa xà pupu ne ihkôat, catyt kam me papa. Pê Pahpãm kra pê Jeju me pajaxà kam ty, ne caprô jaxwÿ, necaprô ata pê ihhêj rûm cô te ampo tũmti cuhhõn pyrâac. Ne cute me pahkên atajê cuneacuhhõn par ne to hapac kêt. Cwÿrjapê ri pahte amji kam me pajapac xà cunea tetet pit.

*Cu ha Pahpãm mã pahte me ampo kên ton atajê cunea na me amji jarê*

<sup>8</sup> Quê ha me pahnõ te amji jarên to:

— Nee ite amji kam ijapac xà kên nõ hamreare — hajÿr na, quê ha ramã taa apu amji

toihhêj to mō, ne nee caxwām pê cumã Jeju te amji kam hapac xà jahkre pej nare.

<sup>9</sup> Ne quêt ajteare mã ita to, cu ha me he. Cu ha Pahpām mã me pahte ampo kên ton atajê cunea na me amji jarê. Ne pahte amji jarên xà ata kam, quê ha Pahpām pahte me pahkênton atajê to tojnō ne hîcu, ne pahte amji kam me pajapac xà kên cunea pê ihhêj ne me pahcuhhôn pa. Ne cupêa ri catyt kam ipa catê, ne pê ramã me pamã ahna amjijarên xà ata, quê ha to.

<sup>10</sup> Ne pê ramã Pahpām rỳ pêa mã me pahto hũjarên to hane he:

— Pjê kam mehcunea mehkrĩ itajê ihtỳj hōtpê mehkên ton to me ipa — hane. Cwỳrjapê quê ha me pahnō te amji jarên to:

— Wa ite nee jũ caxuw ampo kên ton nare — hajỳr na, quê ha ramã Pahpām mã ihhêj xi na hacjê, ne nee Pahpām jarkwa to amji jahôt to ipa nare.

## 2

### *Jeju Crixto pê me pahkritxwỳ*

<sup>1</sup> Me apê imã me ikra kĩnti atajê pyràac. Ampo na? He ca ikôt Jeju to amji mã meahimpej, na wa ite me amã ihkàhhôc ita ton, mār ca me cahyt ne me kampa, ne nee me ampo kên ton to me apa nare. Nãmri quê ha me pahnō te ihkên xà nō tonna, quê ha Jeju pê catyt kam ipa catê ata taa to amji pytà, ne taa Hũm mã harê. Ne cumã amji jarên to:

— Jũm ata te ihkên ton xà ita jahpan xà na ihkên mã mên nare. Ampo na? He pê wa ramã

pa amji toihkritxwỳ, ne hahpan xà na ty — hane. Jeju peaj to impej, na ri ihtỳj me pahto hane.

<sup>2</sup> Jeju tyc xà ata kôt ri Pahpām ihtỳj pahte me pahkên ton itajê jicu, ne totojnō ne to hapac kêt. Ne nee mǎ pahte me pahkên ton xà jahpan xà na pit mǎ Jeju tyc nare, ne pjê cunea kam, mehcunea te mehkên ton atajêcunea kritxwỳ na ri cute amji ton ne ihtyc.

<sup>3</sup> Cu ha pahte me Pahpām te me pamǎ harkwa jirên itajê kam catyt kam me pajapac na, cu ha pahtỳj me pamǎ pahte Pahpām jahkre pej na me amji jahkre pej, neihkôt me papa xà impej na, me pamǎ amji jahkre pej.

<sup>4</sup> Nāmri quê ha jūm te amji jarěn to:

— Wa ramǎ ite Pahpām pupun pejtu, ne imǎ hahkre pej, na wa itỳj ihkôt ipa — hajỳr, ne nee por cutecumǎ harkwa jirên xà atajê kam hapac nare na, quê ha taa ramǎ apu amji to ihhêjto mō, ne apu ahna amji caprỳ jarê.

<sup>5</sup> Ne quêt jūm te Pahpām kam hapac pejti toipa ata mǎ ri caxwām catiamǎ Pahpām kīn, ne ihtỳj cumǎ Pahpām me cute ajpěn kam ihhônco na amji jahkre pej.

<sup>6</sup> Nāmri quê ha jūm te amji jarěn to:

— Wa Pahpām me ajpěn kam ihônco tu — hajỳr ata, quê ha harkwa to amji japackrea ne, ne ihtỳj Jeju pêPahpām kra te amji kam hapac xàa kôt ipa na amji to ihtỳj tu ne. Ne ihtỳjcumǎ Pahpām me ajpěn kam ihhônco tu na amji jahkre pej.

*Cu ha me pamǎ ajpěn kīnti to me papa to me*

*prãm*

*Jowăw 13.34-35; 1 Jowăw 3.14-18*

<sup>7</sup> Imă me ijŏ ikwÿ nŏ kĭnti itajê, xà ajkĭ cormă wa Pahpăm te me amă harkwa jirên xà itajê na me amă ihhŏc? Hăpà! He rÿ pêamă ramă pahte me ajpĕn kĭnti xà ita na cute me pamă harkwa jirên xà ata na me gŭpar.

<sup>8</sup> Na wa ha Jeju te amji kam hapac xàa kŏt hipêr me amă harĕn to intuw. Ne pahte me ajpĕn kĭn kam me pahtĕm xwÿjrea na, pê mam ramă Jeju amjimă me pahkĭn. Ne pom Jeju te amji mă me pahkĭn ata pê ihhêj rŭm pyt kră cator pêê mă hàhcujro. Ita kŏpit na, pahte me ajpĕn kĭn to me papa xàita pê ihhêj rŭm ramă pyt jàpir tu jàhcujro. Na ri pahte ajpĕn kĭnti to me papa xà ita pê ihhêj rŭm, nee me pahkam awcapàtkŏ nare.

<sup>9</sup> Nămri quê ha jŭm amji jarĕn to:

— Pahpăm te ihhêj ne imă ite amji kam ijapac xà kujro, cwÿrjapê ri imă ampo pejcunea ton jahkre pej — hane, ne ma apu Jeju kam ajpĕn to mehkjêjê atajê nŏ caca, ne nee me to impej nare na, quê ha ihhêj ne cormă awcapàtkŏ kam apu ipa ita na.

<sup>10</sup> Ne por jŭm mă Jeju kam cute ajpĕn toi hkjê kĭnti, mă ihkĭn mea mă ipaata pê ihhêj rŭm amcro jàhcujro kam ipa xà, cwÿrjapê quê ha nee catyt kam ipa jicu nare.

<sup>11</sup> Ne por jŭm mă ihkjê kĭn nare, mă ma apu ihcaca ata pê ri ihhêj rŭm awcapàtkŏ jàmkră kam mŏr xà ata pyrăac. Ne cupê ihhêj rŭm mento tŭam, ne nee hăn ne catyt kam Pahpăm te amji kam hapac xà kŏt ipa nare.

*Cu ha pjê kam amji kam me hapac xà kaj na me papa to me prãm*

12-14 Ihhêj rûm me apê me ikra pyrâac, na wa ite me amã ihhêc. Ampo na? He me amã Pahpãm pê me Apãm jahkre pej. Na ri ihkra pê Jeju tyc xà atakôt, cute me akên itajê to tojnõ ne hîcu. Ne por ca ramã Jeju kôt ate me apato me amji kâhtu atajê mã, wa ite hanea ne ihhêc. Ampo na. Me amã, por pê ramã Pahpãm pjê ton xwÿjrea na jûm ipa ata jahkre pej. Ne pom ca curmãJeju kôt ate me apa kam me atêm atajê mãhanea ne ite ihhêc. Ampo na? He ampeaj kam meatÿj, ne me acaxwãm pê ihtÿjPahpãm jarkwa amji to ajpa. Na ca ate amji kam me gapac xà impej to, ate mepahcurê xwÿn pê Xatanaj jirô pê me axãm, ne me tohjê.

15-16 Ne wa ha me amã pjê ita kam, Pahpãm curê xwÿn te amji kam hapac xà me ampo cuneahapôj itajê cawpa. Pom pjê kam ampo kên itajê nee côjkwa pîn, Pahpãm pîn hapôj nare, ne pjê ita pîn ri hapôj. Ne por Pahpãm curê xwÿn catêjê atajê te amji kam hapac xà incrê itajê mã he.

Cute me Pahpãmmã ampo kîn nare atajê xen. Ne cute me cumã ampo kên xen atajê to, cute me amji cajpuawprãmte, ampeaj kam me cumã hàn.

Ne hanea ne quê ha ampo te mehcajpuaw ata pupu, ne me ahna prãm pyrentu.

Ne hanea ne me cumã hàhcukrêj jàhtôti atajê kôtihtÿj amji to me cati prãm to me ipa.

Atajê mã ri Pahpãm kîn nare. Na ca ha nee me apêjûmjê atajê pyrâc, ne amji mã ampo itajê na

pit mã prãm to me apa nare. Ne Pahpãm ca quêt amehkĩn. Nãmri ca ha ate me amã ampo itajêpit kĩn na, quê ha nee me amã Pahpãm kĩn nare.

17 Ne mër ampo na mã wa me amã ampo itajê cawpa to hane? Nee mã ampo na nare. He quê ha jũ caxuw pjê te amji kam hapac xà itajê cunea me, Pahpãm curê xwỳn te ampoxen xà itajê cunea ihkên mã axà ne hamre tu. Ne por quêt me cumã Pahpãm kĩn, mã Pahpãm mã ampo kĩnti to pit mã amji kam me hapac tome ipa atajê, quê ha quêt me ahtwỳ, ne amji to me ipijapar rohnỳtti mã, Pahpãm cahê na.

*Cu ha nee Crixto curê xwỳnti hêj xi xà kam me pajapac to me prãm nare*

*1 Jowāw 4.1-6; 2 Jowāw 7-11*

18 Me ikra, he ramã ampo cunea jamre xà na hàhtêp. Ne ramã ate me Jeju Crixto curê xwỳnti ata jarên par. Ne por jũm ata pê ihhêj ne pũ rũm Jeju Crixto teamji kam hapac xà kôt ipa catê, ne caxwãm pê aracri cupê Jeju curê xwỳn. Neramã Jeju curê xwỳn catêjê jàhtôa ne me hapôj, cwỳrjapê ri ramã me pamã ampo cunea jamre xà na hàhtêp to mõi na hahkre pej.

19 Ne pê mam me pahcurê xwỳn itajê pê me pahkwỳa, ne ihtỳj me pahcahê naipa. Ne hamre, ramã ma me papê cator, ne nee mã ampo na me papê cator nare. Pê pahte amji kam mepajapac xà kaj na amji kampa. Quê ha cama me cupê me pahkwỳ na mã, quê ha ita ri me pahcahê na ame ipa. Pê me papê me hapôj xà ata kôt me pahcunea te me cupê me pahkwỳ nare na me hahkre pej.



<sup>20</sup> Pê Jeju Crixto me amã Pahpãm Carõ Pejti gō, pê ca ahna me amji capa, cwÿrjapê ri me acunea mã Pahpãm te amji kam hapac xà impejti, hêj xi nare ata jahkre pej.

<sup>21</sup> Xà ajkĩ ate me Pahpãm te amji kam hapac xà impejti jahkre pej nare na mã, wa ite ahna me amã ihhōc? Hãpà. He ramã me ate, cute amji kamhapac xà impejti kam ihhêj xi nare na, ate me hahkre pej.

<sup>22</sup> Wa ha me amã mehhêj xi catêjê jarê. Quê ha jũm te me amã hũjarên to:

— He nee Jeju pê, por pê Pahpãm me pamã pahpytâr catê na Crixto to awjahkre ata nare — hajÿr na, ca ha mehhêj xi na me hahkre pej pyrentu. Ne ihtÿj Jeju meHũm pê Pahpãm to mehhêj to me ipa, ne ma ame curê. Cwÿrjapê ri jũm ata pê Crixto curê xwÿnti.

<sup>23</sup> Ne por jũm Jeju pê Pahpãm cãmter ita to ihhêj xi ata, hanea ne ihtÿj Pahpãm pê Hũm to ihhêj xi, ne ma apu curê. Ne quêt jũm te ihcãmter na amji caxàrata te ramã hanea ne Hũm na amji caxàr.

<sup>24</sup> Pê ca Pahpãm wÿr me apkjê, ne me kampa atakam, pê ca me Pahpãm teamji kam hapac xà cunea jahkre pej. Ne ate mehahkre pej atajêa kôt, ca ha catyt kam me apa kam me toacrà. Ita na ca ha ihcãmter me Hũm kam me ajpên hōnco ita na, ne me atĩr rohnÿtti mã, Pahpãm cahê na.

<sup>25</sup> Hõ, ampo ita to pê ihcãmter me pamã awjahkre.

<sup>26</sup> Ne pom ame amã ihhêj xi prãm to me ipa itajêna, wa ite me amã ihhōc.

27 Ne ramã Crixto te me amã Carõ Pejti jör. Mã me akam Carõ Pejti itakam, ca ha nee me jũm te me amã ampo to hahkre xà atana me prãm nare. Ampo na? Carõ Pejti ata ri ihtỳj me amã Pahpãm te amji kam hapac xà cunea tohahkre to ipa. Ne cute ampoto hahkre xà atajê nee mã ihhêj xi nare, ne quêt ampeaj kam ri. Cwỳrjapê ca ha Carõ Pejti te me amã ampo to hahkre xà atajê na kam megapac to impeaj ne, ne ma ihkôt me hakop. Ne Crixto me ajpẽn kam me ahônco kam me to acrà.

28 Ỡhỹ, imã me ikra kĩnti itajê. Quê ha ihtỳj jũ caxuw me pajõPahhiti pê Jeju Crixto hacpỹ ne me pahwỳr amji jaxà. Cwỳrjapê ca ha Crixto me ajpẽn kam me ahônco kam me to acrà ita na. Mã ca nee kam ame apahàm, ne ame amji mã hũpa nare, ne atỳj cuna mã me xa.

29 Ne ramã me amã Crixto pê Pahpãm kra te catyt kam ampo pej pit ton to ipa na hahkre pej. Na cu ha pahte catyt kam ampo pej pit ton to me papa na, cu ha hanea ne me papê Pahpãm kra na ramã me pamã amji jahkre pej.

### 3

*Cu ha pahtỳj jũ caxuw Jeju Crixto me, me ajpẽn*

*Jowãw 1.12-13; 1 Petrô 1.13-21; 2 Petrô 3.11-14*

<sup>1</sup> Pỳhàpà, he Pahpãm mã me pahkĩan to me pahkĩn! Ne ihtỳj cute me pahto amji kra. Mã pjê kam me cupê Pahpãm tekjê nare, ne ma ame curê atajê pê me papêihkra na me pajahkre

kêatre. Ampo na? He nee me Pahpām jahkre pej nare na ri.

<sup>2</sup> Imã me ijō ikwỳ nō kīnti itajê, ramã me papê Pahpām kra. Ne cormã jũ caxuw me papê ihkraa to ihkra xà ata na, cormã pahte me amji jahkre pejpej nare. Ne ita ri me pamã hahkre pej he: Quê ha hacpỹ ne Jeju me pahwỳr amji jaxà, ne me pamã amji to ajpê, cu ha ajteare mã, ihnō na me hōmpu. Ne pahte me hōmpun xà ata caxuw, cu ha me amji to intuw, ne Jejume, me ajpëan.

<sup>3</sup> Ne pahte amji to me papintuw xà impejti ita jikaj xà ata kam, cu ha hahkà na amji tête pahte amji kam me pajapac xà kên cunea japôj to memō. Ne pahte amji kam me pajapac xà tetetti impejti to me amji kampa to me hanea, pom quê Jeju te amji kam hapac xà tũm nare ne ihtetetti he.

<sup>4</sup> Ne quê ha jũm te, cute amji kam hapac xà kam ampo kên to ihtũm na, quê ha taa ramã Pahpām jarkwa jirô pê ihpỳm, ne ihkaj na amji kampa.

<sup>5</sup> Ne ramã me amã Jeju te jũ caxuw ampo kên ton nare na hahkre pej. Ne taa mã pê me pahwỳr wrỳ, cute me pahcunea tête me pahkên jūrên prãnte.

<sup>6</sup> Na cu ha pahte Jeju kam me ajpën hōnco na, cu ha nee me pahkên ton kam me to pancrà nare. Nãmri quê ha jũm te Jeju jahkre pej nare, ne hōmpun pej nare kam, mãnea mã ihkên ton kam to incrà na, quê ha nee Jeju to amji mã ihhimpej, ne me ajpën kam ihhōnco nare.

<sup>7</sup> Imã me ikra kīnti itajê, nee ca amji na me jũm jamãr quê me amã ihhêj nare. Ne por jũm

catyt kam Pahpām cuna mǎ impejti to ipa ata pê riJeju pyràac, ne catyt kam ipa.

<sup>8</sup> Nāmri quê ha jūm te mǎnea mǎ ihkên ton to ipa na, quê ha Pahpām cuna mǎ ihkêanre ne, ne cupê me pahcurê xwÿnti pê Xatanaj tekjê. Ampona? Pê Pahpām pjê ton pêa mǎ, pê Xatanaj ihkên ton kam tē. Cwÿrjapê ri cute Xatanaj jàpên xà cunea to hamre xà caxuw me Pahpām kra cato.

<sup>9</sup> Ne por me cupê Pahpām kra atajê, nee mehkên ton kam me to incrà nare. Ampo na? Me caxwām pê Pahpām te amji kam hapac xà hàpên to ipa na ri. Ne Pahpām pê me Hūam to me Hūm ita kam, jū mǎ quê ne ajte mehkên ton kam me to incrà? Jū wÿr quê jūm hane!

<sup>10</sup> Mēr me Pahpām kra, me Xatanaj kra te amjikam hapac xà to me ajpên ne me hōmpu. Por jūm nee catyt kam ipa nare ata me, cumǎ ihkjê kīn nare atahirǎ pê nee cupê Pahpām kra nare, ne cupê Xatanaj kra.

*Cu ha me pamǎ ajpên kīnti to me papa to me prām*

*Ruc 10.25-37; Jowāw 13.31-35*

<sup>11</sup> Imǎ me ijō ikwÿ nō kīnti itajê, por pê wa mam me amǎ Pahpām jarkwa jarê ata, wa ha hipêr me amǎ harên to mō:

— Cu ha me pamǎ ajpên kīnti ne — hane.

<sup>12</sup> Cu ha nee me papê me panquêt xwÿ pê Cǎn kēanre pê Xatanaj tekjê, ne ihtōa cura ata pyràc nare. Ne mēr ampo na mǎ pê ihtō te amji to hapure ita cura? Pê ajco hapure catyt kam impejti ton to ipa, ne Cǎn pê ihkīnte ajco

ihkêanre ton to ipa, ne ma apu ihtõre te impejti ton ita na to ihcaca, na pê ihcura.

<sup>13</sup> Ỹhỹ me ikjêjê, he me cupê pjê ita tekjê catêjê te ihkên ton to hajỹr tũam. Ne quê ha cute me hajỹr catêjê ma ame acurê, ca nee me amji mã:

— Pỳhàpà, ampo na mã ame icurê? — hajỹr nare.

<sup>14</sup> Ne por me cumã mehkĩn nare atajê pê ri ihhêj rũm mehtyc pyrác, ne nee me ampo pej ton nare, nema ramã ihkên kam, cute me amji pupun xà kêanre ata wỳr me pra. Ne me pa nare. Ihtỳj quêt me pamã Jeju kam me cupê me pahkjêjê kĩn. Cwỳrjapê cu ramã me papê ihhêj rũm pahte me pahtyc xà jahpan, ne ma me pampej mã, amjikĩnti ata wỳr me pamprar pyrác.

<sup>15</sup> Quê ha jũm te ma apu ihkjê curê na, quê ha ramã Pahpãm mã cupê mehcuran catê pyrác. Ne ramã me pamã, jũm pê mehcuran catêata te nee Pahpãm cahê na ihkrĩ nare na, hahkre pej.

<sup>16</sup> Jũ mã cu ha ajte me, ne me pamã ajpẽn kĩn ita na me ajpẽn jahkre pej? MeJeju pupu he. Ampeaj kam cumã me pahkĩn, cwỳrjapê ri me pajaxà kam ihtyc. Ata pê ri me pamã ajpẽn kĩnti xà. Na cu ha me pamã me pahkjêjêkĩn hanea, cu ha pahtỳj mencwỳrjapê me pahtyc na me amji to ihtỳj tu to me papa.

<sup>17-18</sup> Ne nee cu ha me pajarkwa to pit mã ame pahkjêjê kĩn, ne me to impej nare. Ne me hàpên xà na cu ha me tehcajpa, ne me to impejti ne, ne ampeaj kam me pamã mehkĩn. Ne quê me anõ mã ampo, ca me akjêjê nõ pupu quê apu ampo na prãm to mỗ, ca ha hõmpu ne atỳj gàhcukrêj to

ihtehcajpa. Nāmri ca ha ate nee me akjêjê caprî nare, ne nee mehtehcajpar nare ita kam, jũ mã ca ha ajte ne amji jarên to:

— Imã Pahpãm kîn — hane?

*Cu ha ajpên kînti to me papa na, cu ha pahcaxwÿn carîcti kam me papa*

<sup>19</sup> Me pamã me pahkjêjê caprî xà ita ihtÿj me papê Pahpãm hêj xi nare ata tekjê na me pajarê. Cwÿrjapê cu ha Pahpãm cuna mã me paxãm xà jŏ amcro ata kam, cu ha nee me pahkên na me amji cãmji nare, ne quêtme pahcaxwãm pê me pahcarîcti ne.

<sup>20</sup> Nãmri cu ha me pahcaxwãm pê me pahcarîc nare na, cu ha cama me amji cukij to:

— Xà ajkî ipê Pahpãm tekjê? Nare mŏrmŏ nee ipê hŏ tekjê nare — hajÿr na, cu ha cormã me Pahpãm mã ampo cunea jahkre pej ata to meamji japackre. Ne hanea ne cumã me pajirôa pê me pamã pahte amji kam me pajapac xà pupun na me hahkre pej. Ne ita jirô pê cu ha cormã cumã me pahcaprîata na me to amji japackre.

<sup>21</sup> Imã me ijŏ ikwÿ nŏ kînti itajê, cu ha pahte me ajpên kîn na, cu ha nee me pahcaxwãm pê amji mã ame Pahpãm cupa, ne nee ame pahpahàm nare.

<sup>22</sup> Ne por cu ampo cunea na me cuwÿ atajê, quê haihtÿj me pamã cugŏ. Ampo na? Cu pahtÿj cute me pamã harkwa jirên itajê na me kampa, ne cuteamji mã ampo kînti itajê to pit mã me hupkre cahkô to me papa.

<sup>23</sup> Pê Pahpām mehcunea mǎ harkwa hyr to hane he:

— Ikra pê Jeju Crixto to ca amji mǎ me ahimpej, ne hanea ne me amǎ ajpēn kīnti ne — hane. Ne pê hanea ne me imǎ harkwa hyr to hanea he.

<sup>24</sup> Quê ha jūm te Pahpām te cumǎ harkwa jirēn itajê na kam hapac to ipa na, quê ha cume ajpēn hōnco tu ne, ne ajpēn kam mehkrī. Ne pê Pahpām me pamǎCarō Pejti gō, cwyrjapê ri me pamǎ ita jahkre pej.

## 4

*Cu ha nee Jeju curê xwýnti atajê kam me pajapac to me prām nare*

*1 Texarōn 5.21-22; 1 Jowāw 2.18-26; 2 Jowāw 7-11*

<sup>1</sup> Imǎ me ijō ikwý nō kīnti itajê, quê ha me hàhtōa ne me amǎ amji jarēn to:

— Pahpām Carō Pejti te imǎ amji jōr, wa harkwa kōt harēn to ipa — hane. Ca ha nee me kam gapac nare. Ampō na? He ramǎ me hàhtōa ne pjê kam amehcahkūm, ne Pahpām jarēn xà kaj na ame harēn to me ipa. Cwyrjapê ca ha ma me jūm te me amǎ amji jarēn to hajyr ata kōpī, neihkōt me hakop, hàpēn xà atajê na.

<sup>2</sup> Cu ha me kampa, quê ha cute catyt kam me amǎ Pahpām jarēn to:

— Pê Jeju me paxūmrea na amji to, ne me pahwyr wrý, ne cupê, por pê Crixto to me pahkritxwý na, Pahpām me pamǎ awjahkre ata — hajyr na, ca ha me kampa. Ne me amǎampeaj kam cupê me amǎ Pahpām jarkwa

to ihcakôc catê, ne kam Pahpām Carō Pejti na me hahkre pej pyrentu.

<sup>3</sup> Nāmri quê ha cute Jeju jarēn to hajjyr nare na, ca ha ramā kam Pahpām Carō Pejti nare na me hahkre pej, ne kam Jeju Crixto curê xwÿnti carō kên na mehahkre pej pyrentu. He pê cu ramā ampo carō kên ita te pjê wÿr ajpên mōr na me harēn pa, ne hamre, ramā cator ne ihtÿj apu mō.

<sup>4</sup> Jeju kam me apê me ikra kīnti atajê, me apê Pahpām tekjê, na ca ramā cute me Pahpām jarēn kaj na ame harēn catêjê atajê jirô pême axām, ne me tohjê. Ampo na? He me akam Pahpām Carō Pejti ihkrī ita ri, pom pjê kam me kam ampo carō kên atajê jirôa pê ihtÿj.

<sup>5</sup> Ne me cumā pjê kam ampo itajê jarē, mā ihtÿj me cupê pjê ita tekjê pê Pahpām curê xwÿn catêjê mekampa. Ampo na? He pjê ita te amji kam hapac xà ri me cumā harē, mājê ita kam me ipa catêjê pê Pahpāmcurê xwÿn atajê ihtÿj ahna me kampa.

<sup>6</sup> Ne me pa nare, he quêt me papê cōjkwa pīn Pahpām tekjê, ne cu me Pahpām te amji kam hapac xà to pit mā me hupkre cahkô to me papa. Quê hajūm mā Pahpām jahkre pej na, quê ha ihtÿj me pahkampa. Nāmri quê ha cumā Pahpām jahkre pej nare na, quê ha nee me pahkam hapac nare. Ita na cuha me Pahpām Carō Pejti te amji kam hapac xà impejti hêj xi nare ata me, ampo carō kên te amji kam hapac xà kên te to ihcupan xà na me hahkre pej.

*Cu ha Pahpām cuxà me pamā ajpēn kīnti na*



*to prãm*

*Jowãw 3.16-21; Roman 5.5-9*

<sup>7</sup> Imã me ijō ikwý nō kīnti itajê, cu ha me pamã ajpên kīn, cu ha me ajpên to impejti ne. Ampo na? Pahpãm te amji kam hapac xà ita te hajÿr pit, ne taa mã ri me pamã ajpên kīnti ita na me pahtehcajpar toipa. Por jũm mã mehcunea kīn, mã me to impej ata pê ri Pahpãm kra, ne ihtÿj cumã Pahpãm te amji kam hapac xà na hahkre pej ne hahkre pejtu.

<sup>8</sup> Ne por jũm mã mehkīn nare ata pê Pahpãm jahkre kêatre. Ampo na? Pahpãm jãhcaprĩa to hàhcaprĩ, ne cupê cumã mehkīnti xà cunea xakat.

<sup>9</sup> Ne Pahpãm mã me pahkīnti na cute me pamã amji to ipipê xà caxuw, me pamã pjê wÿr cumã ihkra pyxit peaj ata kujate, mãr cu me cute amji kam hapac xà intuwti impejti ita cwa, ne kam me pahÿr rohnÿtti mã.

<sup>10</sup> Me pamã Pahpãm kīn, ne me pajirôa pê cumã me pahkīn. Cwÿrjapê pê me pamã ihkra pê me pahkritxwÿ ata kujate, mãr quê pahte me to kên ata jahpan xà na ty, quê Pahpãm pahte me to kên xà atajê jicu.

<sup>11</sup> Imã me ijō ikwý nō kīnti atajê, he ramã Pahpãm mã me pahkīnti ita kam, cu ha pahÿtÿj me pamã ajpên kīnti ne.

<sup>12</sup> Rÿ jũ caxuw jũm te Pahpãm pupun nare cakrô, cu pahÿtÿj kam pahte me amjihônco. Mã me pahcaxwãm pê ihkrĩ, ne cumã me pahkīnti na ri cute amji kôat me pahÿton, mã me pamã ajpên kīnti.

<sup>13</sup> Ne cute me pamã Carõ Pejti jõr na, ca me to amji japackre. Čwýrjapê ri pahte Pahpãm kam me ajpẽn hõnco tu na me pamã amji jahkre pej.

<sup>14</sup> Pahpãm pê me pajõ Inxũ Cati, na cu hõtpê mehcunea mã me harẽn to me papa to me hane he:

— Pê Pahpãm pjê wýr ihkra kujate. Pê wa hõmpu ata temehcunea caprĩ ne mehkẽn catihti ata pê me hũtår xacaxuw pê pjê wýr ihkujate — hane.

<sup>15</sup> Nãmri quê ha jũm te Jeju Crixto pê Pahpãm kra na harẽn na, quê ha Pahpãm jũm ata mã amji gõ, ne kam ihkrĩ, quê ha hanea ne Pahpãm mã amji gõ, ne kam ihkrĩ, ne ajpẽn kam mehhõnco tu ne.

<sup>16</sup> Ne me pamã Pahpãm te me pahkĩnti na hahkre pej, na cu toa amji mã me pahhimpej to me papa. He Pahpãm pê me pamã ajpẽn kĩn ton catê xakat. Ne por me cumã ajpẽn kĩan kam mehkřĩ atajê ri, Pahpãm kam cute me ajpẽn hõnco tu.

<sup>17</sup> Ne quê ha ihtýj jũ caxuw Pahpãm te me pahcukij xà ata kam ihtýj me pahto ajcokjê. Cu ha Jeju te cormã pjê kam ipa reria mã me cumã mehkĩntiata cuxà, me pamã mehkĩnti na, cu ha neeamji mã ame hũpa, ne kam ame pahpahàm nare.

<sup>18</sup> Quê ha jũm te mehcunea caprĩ ne mehkĩn to ipa na, quê ha nee jũ caxuw amji na ampo cãmji nare. Ampo na? He Pahpãm mã ampeaj kam me pahkĩn, na cu ha nee amji mã ame ampo cupa nare. Nãmri quê ha jũm mãmehcunea kĩn nare na, quê ha ihtýj amji na Pahpãm cãmji pyrentu, ne cumã hũpa. Ne cumã ampo cupahti ata quê

ha ihkên ata mã cumẽ.

<sup>19</sup> Pahpãm mã mam me pahkĩnti, cwÿrjapê ri me pamã ihkĩn.

<sup>20</sup> Nãmri quê ha jũm te amji jarẽn to:

— Imã Pahpãm kĩn — hajÿr, ne cumã Jeju kam ihkjê kĩn nare, mã ma apu curê, ata ri ihhêj xia to ihhêjxi. Ne jũ mã quê Pahpãm pupun nare kam cumã ihkĩn, ne ihkjê pupun cakrô, ma apu curê ne apu ihcaca? Jũ wÿr quê cute hajÿr ita kam apu amji mã hamã.

<sup>21</sup> Pê Crixto me pamã ita na harkwa jirẽn to hane he:

— Por jũm mã Pahpãm kĩn ata mã, quê ha ihtÿj hanea ne ikam cupê ihkjê ata kĩn — hane.

## 5

*Cu ha me pamã Pahpãm kĩn na, cu ha me harkwa kampa*

*Roman 8.35-37; Ipipẽn Xà 3.5*

<sup>1</sup> Por quê ha jũm Jeju Crixto pê Pahpãm kra, pê Hũm me pamã cupê me pahpytâr catê na to awjahkre ata to jũm amji mã ihhimpej, ata pê riPahpãm kra impeaj. Cu ha me pamã jũm xũmre ata kĩn na, quê ha hanea ne me pamã ihkra ata kĩn.

<sup>2</sup> Jĩkjê na mã, quê ha me pamã Pahpãm kĩn, cu ha cute me pamã harkwa jirẽn xà atajêa na, kam me pajapac na, quê ha hanea ne ihtÿj me pamã me cupê Pahpãmkra na mehkwÿ atajê kĩn.

<sup>3</sup> Xà quê pijamã me pamã Pahpãm kĩnti ita kam, cu nee ajte cute me pamã harkwa jirẽn xà itajê kam me pajapac nare? Hãpà, cu ha pahtÿj

amji mã me kampa! He xà cute me pamã harkwa jirên itajê ajkĩ ampeajkam me pamã ihtỳj? Hãpà.

<sup>4-5</sup> He pom me papê Pahpãm kra ita, ne cutea ri me pamã ampo cunea kam, pahte Pahpãm kam me pajapac xà caxuwcarôt jŏr. Ne pahte Jeju pê Pahpãm kra to amji mã me pahhimpej, cwỳrjapê cu ha pahtỳj, Pahpãm te me pamã carôt jŏr ata kôt, pjê ita kam Pahpãm curê xwỳn atajê te me amji kam me hapac xà kên cunea tohjê.

*Cu ha Jeju Crixto cãmtà rŭm Pahpãm cahê na me papa rohnỳtti mã*

<sup>6-7</sup> Ne jũ mã cu ha me, ne me Pahpãm te Jeju to mehcunea pytàr catê na hãm xà ata na me hahkre pej? He cŏjkwa kam menchrê ne cute me pamãharên. Atajê pê, Jeju Pãm pê Pahpãm ata te cŏ kam ihcumrâr xà ata kam ri, Jeju pê ihkra na harê. Ne pê hanea ne Jeju pê Hŭm Jĩa Jarkwamã iwryc ne ihtyc, ne cute caprô jaxwỳr ata te ri, cupê Pahpãm kra na harên. Ne pê hanea ne Pahpãm Carŏ Pejti hêj xi nare ata cupê Pahpãm kra na harê. Ne menchrê atajê pê Pahpãm to Pahpãm, ne ajpên kam me pyxit peaj.

<sup>8</sup> Ne hanea ne cormã ita kam pjê kam menchrê ne me pamã Jeju pê Pahpãm kra na harên to me ipa ita na. Atajê pê Pahpãm Carŏ Pejti hêj xi nare ata, mã catykam me pamã Jeju jarê. Ne hanea ne cŏ kam me pahcumrâr xà ata ihtỳj me pamã harê. Ne hanea ne me pamã Jeju tyc na pahte me to amji japackre xà ata, ihtỳj me pamã harê. Ne harên crê itajê pipên pit, ne ajpên kam pyxit peaj.

9-10 Ne qu  ha j m te me pam  ampo jar n na, cu ha paht j me kampa. Ne qu  ha Pahp m te me pam  Jeju p  ihkra na har n na, cu ha paht j pahte meh mre j jar n kam me pajapac jir a p  me Pahp m kampa. Ne por qu  ha j m Jeju p  Pahp m kra na amji m  to ihhimpej ata, qu  ha ram  amji caxw m p  amji m :

— Ampeaj kam ri Jeju p  Pahp m kraa to Pahp m kra — hane. N mri qu  haj m te Pahp m to amji m  ihhimpej nare ata, qu  ha iht j Pahp m te apu ihh j xi na har . Ampo na? He nee Pahp m te Jeju p  ihkra jar n x  atato amji m  ihhimpej nare na ri.

11 P  Pahp m me pam  ihkra jar n to hane he:

— Ikra tyc x  ita cw rjap , wa ha me am  cute amji kam hapac x  tuw pejti g , ca ha ihk at me apa, ne me atyc x  jir  p  m  icah  na me akr rohn tti m  — hane.

12 H , por j m te Pahp m kra to amji m  ihhimpej ata te ri, cute amji kam hapac x  tuw pejti pyr. Na qu  ha ihtyc jir  p , Pahp m cah  na apu ipa rohn tti m . N mri j m te nee ihkra to amji m ihhimpej nare ata te nee amji m  Jeju te amji kam hapac x  tuw pejti ata pyr x  hamreare. Na qu  ha ihtyc jir  p , Pahp m p  amp a m  apu ipa rohn tti m .

13 Ne me ca nare. Ca at j Jeju to amji m  me ahimpej, na ri ate me amji m  cute amji kam hapac x  tuw pejti ita pyr. Na ca ha me atyc jir  p , at j Pahp m cah  na me akr  rohn tti m  na ate me hahkre pej pejtu, na wa ite me am  ihh c.

*Cu ha Pahp m m  me pahcak c, qu  ha iht j*

*me pahkampa*

<sup>14</sup> Cwÿrjapê cu ha nee Pahpãm cuna mã hÿpa kam, ahna me pajàhtàt kam, cumã me pahcakôc nare, ne pahtÿj pahte ampo na me prãm xà ata na, cumã me amjicajrën. Ne ramã me pamã Pahpãm te me pahkam hapac, ne me pahtehcajpar na hahkre pej.

<sup>15</sup> Quê ha ihtÿj me pahkampa, ne me pamã pahte ahna mepajàhwÿr xà atajêa jôr na, ramã me pamã hahkre pej.

<sup>16-17</sup> Quê ha jÿm te Jeju to amji mã ihhimpej cakrô, ihtÿj cormã ampo kên ton na, me anô te hõmpun na, ca ha atÿj Pahpãm mã ihcajrën. Mârquê Pahpãm akampa ne jÿm ata tehcajpa, quê nee hipêr ihkên itajê nõ ton nare, ne quêt cute amji kam hapac xà tuw pejti na ipa. Pê Pahpãm pahtecuna mã me to kên xà atajê cunea pê me pahcator na me pamã harkwa to. Mã pahte hirô pê me pahpÿm xà ata na ri ihkaj na, ne ihkêanre. Ne ampo kên pyxitata ri ihkwÿ jirôa pê ihkêanre. Na quê ha jÿm te ihkên catia ata ton to hajÿr to ipana, quê ha ihtÿj jÿ caxuw hahpan xà na ty. Cwÿrjapê ca ha jÿm te ihkên xà catia ata ton to hajÿr na, ate hõmpun na, wa ha nee ate mehcajrën xàna, me amã ijÿjahkre nare.

*Pahpãm me pahte ampo kên ton nare na me pahtehcajpa*

*Jowãw 17.3-6*

<sup>18</sup> Me papê Pahpãm kra impeaj, na cu nee me pahnô ampo kên ton to me papa kam to pancrà nare. Ampo na? Jeju pê Pahpãm kra, ne ihtÿj

me pahcurê xwÿntipê me pahpytà, ne me pahto kên cupate me pajamâr to ipa na, ramã pahte me hahkre pej.

<sup>19</sup> Me pahcurê xwÿnti ita pjê cunea kam mehcunea to ihhimpej cokrô, mã ihtÿj cormã me pamã papê Pahpãm tekjê na, ramã me pamã amji jahkre pej.

<sup>20</sup> Pê Jeju pê Pahpãm kra cato, ne me pamã pahte amji jahkre pej krã kretigõ, mâr cu me Pahpãm pê Pahpãam to Pahpãm na me hahkre pej. Ne Jeju pê ihkra, ne cupêa ri pahte amji kam me pajapac xà tuw pejti xakat na me pamã hahkre pej. Netaa mã ri Hũm cahê na me pahkrĩ rohnÿtti mã na me pahto. Ne por Hũm pê Pahpãam to Pahpãm ata me, cu ha ajpên kam me pahhõnco ita na.

<sup>21</sup> Imã me ikra kĩnti atajê, ca ha nee jũ caxuw Pahpãm ràn xà na pahpãm cahàc krekà nõ to amji mã me ahimpej nare. Hõ, ijõ kàhhõc ita pit. Hamre.

**PAHPÃM JARKWA CUPAHTI JÕ KÀHHÔC**  
**Canela: PAHPÃM JARKWA CUPAHTI JÕ KÀHHÔC**  
**(Portions)**

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 1 Oct 2024 from source files  
dated 29 Jan 2022

09d4e460-c38b-52b7-81c1-8300bfeb466a